

咳
餘
叢
考

陔餘叢考卷三十七

陽湖 趙翼 耘菘

博士待詔大夫郎中

黃省曾吳風錄謂張士誠走卒廝養皆授官爵至今呼
椎油作麵傭夫皆爲博士剝工爲待詔云按明祖實錄
洪武中已命禮部申禁軍民人等不得用太孫太師太
保待詔大官郎中等字爲名稱其時去淮張未遠而民
俗濫稱已遍至煩明禁則由來已久未必起于士誠也
又陸容菽園雜記醫人稱郎中鍼工稱待詔磨工稱博
士師巫稱太保茶酒稱院使此草率名分國初有禁云
然亦不言起于淮張則知非一日也今江南俗椎油賣

茶者尚稱博士鑷工尚稱待詔醫生尚稱郎中而北俗
則稱醫生爲大夫按博士本師長之稱漢武帝立五經
博士爲置弟子五十人後四方來學者皆詣博士受業
故其時弟子稱師皆曰博士沿及六朝此風不改宋書
王微爲兒時從博士讀小小章句北史劉晝知宋世良
家多書乃求爲其子博士恣意披覽北齊張景仁教太
原王紹德書武成帝又令景仁侍後主書後主呼爲博
士登極後與左右語猶稱張博士武成又爲琅琊王儼
求博士得張彫武與景仁號二張博士後周文帝置學
東館教諸將子弟以樊深爲博士可見博士猶先生云
爾封氏聞見記御史大夫李季卿宣慰江南時茶飲初

盛行陸鴻漸來見衣野服隨茶具而入旣坐乃手自烹
茶口通茶名區分指點李公心鄙之茶罷命奴子取錢
三十文酬煎茶博士此茶博士之名之始也蓋其時茶
事初起精其技者尚少故有茶博士之稱而李公因其
稱以嘲之可見是時賣茶者無不稱博士也舊唐書開
元十一年命州縣置醫博士二人則醫亦稱博士也其
椎油者之稱博士蓋亦因專習其技而有是稱或因煎
茶者稱博士而倣之耳按博士之始本起於戰國漢書賈山傳其祖往
故魏王時博士弟子也秦亦有此官史記始皇
本紀侯生盧生曰博士雖七十人特備員弗用又始皇不樂輒令博士爲仙真人
詩令樂人歌弦之漢初亦設此官不過得問未有進用者至武帝立五經博士遂
爲師儒之宗此
博士之沿革也待詔之稱古來原多雜流舊唐書翰林有合
鍊僧道祝卜術謠書奕各別院以廩之天寶中有嵩山

道士吳筠乾元中有占星韓穎劉頊貞元末有奕碁王叔文侍書王伾元和末有方士柳泌浮屠士通寶歷初有善奕王倚興唐觀道士孫準並待詔翰林遼時翰林畫院有畫待詔翰林醫院有醫待詔前明文徵明亦以能書待詔可見翰林中待詔者原不皆文學之士則鑷工之稱待詔蓋亦實有以此技爲待詔者而人因以稱之也若醫生之稱郎中大夫碩寧人以爲起於宋時而引老學菴筆記醫生曰牙推卜相曰巡官之類以証之

按牙推之名不自宋始唐鄭注以藥術于李愬愬苦之習爲牙推問醫生之稱牙推起于唐也北齊書後唐莊宗劉皇后之父舊以醫爲業莊宗服日黃藥藥令手繼炭破爛相隨自稱劉衙推詩人直入后宮后大怒然亦第意擬之詞而未見郎中大

夫之的據按夷堅志鄱醫趙珪本上官彥成之隸粗得

其術人稱爲趙三郎中又劉師道業醫有婦人托爲魏
師成之妻求其療夫疾劉初不知魏已死也至則魏伸
手求診脉覺骨節堅冷如木石婦忽笑曰劉郎中細審
此病不可醫也劉曰娘子拉我來何忽如此婦曰郎中
試看俄化爲狐去又信州吏毛遂病爲劉醫誤用藥致
死忽復活曰是那個郎中主張劉方喜以爲已功應曰
是我毛曰今後須仔細我病本不至死爲汝以藥殺我
我今只在鬼門關候汝耳言訖而死劉亦繼歿此醫生
稱郎中之明証也夷堅志又云張二大夫者京師醫家
後徙臨安官至翰林醫官人仍稱爲張二大夫則北方
醫生之稱大夫亦起於宋矣又按唐時醫生亦稱待詔

張祜有病客入詩云藥餌無徵待詔愁此正醫卜待詔翰林之本稱也

又按大夫本秦漢時士人之通稱漢書高祖紀呂公從沛令沛中豪傑更間令有重客皆往賀蕭何爲主吏令諸大夫日進不滿千錢坐之堂下按沛中豪傑吏蓋不過鄉豪及健吏之類而通謂之大夫蓋秦制賜民爵有大夫官大夫公大夫五大夫七大夫諸稱漢書註五大夫第九爵也七大夫第七爵也大夫第五爵也度其時民之有此爵者人卽以其爵呼之相沿日久遂以爲尊奉之呼故鄉豪及健吏皆得稱耳一漢書高祖詔曰七大夫以上皆高爵也久立吏前會

不爲決甚無謂也異日秦民爵公大夫以上令丞與
亢禮今吾於爵非輕也又可見當時爵雖大夫而以
事至官吏前仍循部民之制

大人

大人之見於經書者周易大人與天地合其德陸德明
釋文引王肅云聖人在位之目以及孟子大人者不失
其赤子之心莊子大人者聖人不足以當之之類皆以
德位兼言惟論語畏大人孟子說大人則貌之則以勢
分而言又左傳閔子馬曰夫人必是說而後及其大人
邾黑肱以濫來犇君子曰艱難其身以險危大人註皆
言在位者然此特泛論有位之人非覲而尊奉之呼也

司馬相如大人賦則更以稱天子而其時公卿大臣無大人之稱可知其呼爲大人者則以施于父母伯叔如家語曾子曰參得罪大人又史記范蠡之長子曰家有長子今弟有罪而大人不遣是吾不肖也漢高祖云始大人以臣爲無賴霍去病云不早自知爲大人遣體南史王僧儒幼時有人以冬李餽其父先以一與之僧孺辭曰大人未見不容先嘗北史田式以事下獄欲自盡其子信勸之曰大人朝廷重臣又無大過何至于此唐書裴炎云大人病痛若此撫言楊國忠子應試學問荒陋禮部侍郎達奚珣畏國忠使其子撫先白國忠曰大人白相公郎君所試不中程式然亦未敢黜落五代史

王珂妻本李克用女珂被梁圍急使妻致克用書曰賊勢如此大人忍不救耶宋史蔡京子攸入謁握父手曰大人脉勢舒緩體中得無不適又隱逸傳南安翁以長子被拘于官欲詣官代長子杖小兒曰大人豈可受杖兒當代此皆以呼其父也漢書疏受叩頭曰從大人議此以呼其叔也張博詐淮陽王欲上書爲大人乞骸骨去後漢書范滂曰惟大人割不忍之恩此皆以呼其母也柳宗元稱劉禹錫之母云無辭以白其大人亦謂禹錫之母是大人之稱止以稱父母伯叔從未有以之稱尊官者考唐宋以來仕宦相呼敵以下或稱字尊長稱丈公卿貴官則稱其官位宋天聖中詔文武官不得過

稱官品諸節度使觀察使未至太傅者許稱太傅防禦使至橫行使許稱太保諸司使許稱司徒皆本等檢校所應帶之官也又洪容齋記李德裕自崖州與某侍郎書云崖州司戶叅軍李德裕狀侍郎十九弟及李文定稱王沂公云樞密太師相公之類是皆以官位相呼無所謂大人者戴埴鼠璞云四明有大人堂本錢億曾爲此州節度後其姪惟治復來節度因創爲祠名曰大人堂蓋大人之稱乃子弟稱父兄之詞而俗訛以爲闕相公廟謨矣梁溪漫志及莊綽雞肋編亦謂世惟子稱父爲大人若施之於他則衆駭笑之矣可見宋時猶以大人稱父母而不加之達官貴人也元人高則誠琵琶記

蔡狀元呼黃門爲大人則元時達官已有大人之稱明
尹直簪齋瑣碎錄吳與弼以處士徵至京每見士大夫
皆稱大人又湧幢小品徐晞以吏員起仕至尚書歸郡
守率諸生迎之諸生以其非文學出身頗偃蹇晞出一
對曰劈破石榴紅門中許多酸子諸生不能對晞爲對
曰咬開銀杏白衣裏一個大人王弇州觚不觚錄三司
見督撫稱老先生見巡按稱先生大人此又前明以大
人爲貴官之稱也按後漢書鄧禹傳禹孫康以鄧太后
臨朝遂謝病不朝太后使內侍者問之時宮人出入多
能有所毀譽其中耆宿稱爲中大人所使者乃康家婢
也亦自通中大人康詎曰汝我家出亦敢爾耶又陽球

傳球小妻程璜之女璜方用事宮中所謂程大人也蔡邕諫靈帝疏亦云乳母趙婕譏諛驕溢門吏霍玉依阻爲奸今道路紛紛復云有程大人者察其風聲將爲國患據此則東漢時已有大人之稱蓋本宮闈近侍之人身無官位而勢居顯要故以大人稱之其後遂爲近侍尊稱如晉書劉聰時中宮僕射郭猗欲王皮劉惔二人證成皇太弟劉乂謀逆之事以計脅之皮惔大懼皆曰謹奉大人教此又近侍稱大人之明証也琵琶記黃門稱大人黃門亦近侍也惟近侍稱大人因而後世相沿京朝官亦稱之如徐晞以尚書稱大人也京朝官稱大人因而京官出使於外者亦皆以大人稱之如巡按稱

先生大人是也因而遂爲貴官之隆稱於是督撫亦稱之此又近日京官外官位高者皆稱大人之所自也按諸史所載亦有以官位而稱大人者後漢書岑彭傳韓歆南陽大人註謂大家豪右也唐書郭子儀應回紇大人之占段秀實傳田少榮稱秀實爲仁信大人高駢傳女巫王奉仙謂畢師鐸曰揚州災當有大入死是古來原有貴官稱大人之例據雞肋編所云則南宋時尙專屬子之稱父而不以稱貴官則唐以前稱貴官爲大人者乃從旁指目之詞而非靚面相呼也靚而稱大人則始於元明耳

顯考

祭法王立七廟曰考廟則父也曰王考廟則祖也曰皇考廟則曾祖也曰顯考廟則高祖也檀弓殷主綴重注始死未作主先以木爲重至虞乃作主殷人作主後則聯其重縣諸死者之廟去顯考乃埋之疏顯考高祖也世世遞遷至爲顯考其重猶在離顯考乃埋之是古人皆以高祖爲顯考也其稱父亦曰皇考皇者大也於君上之義無涉曲禮父曰皇考母曰皇妣離騷朕皇考曰伯庸晉司馬機爲燕王告耐廟文亦曰敢昭告於皇考清惠亭侯是也徐健菴讀禮通考謂今人以顯考爲父則起於有元之世時以皇字爲君上尊稱遂易爲顯考然葉石林云漢議宣帝父稱羣臣初請諡爲悼太子魏

初以爲宜尊稱曰皇考自是皇考遂爲尊號之稱非後世所得通用石林之言如此則似宋時已無稱父爲皇考之例矣健菴之說不知何所本

孤哀子

今人父亡稱孤子母亡稱哀子按古禮父母喪皆稱哀子如雜記云祭稱孝子孝孫喪稱哀子哀孫孔疏曰祭謂卒哭以後之吉祭喪謂虞以前之凶祭又儀禮筮宅之辭曰哀子某爲其父某甫筮宅又曰哀子某來日卜葬其父某甫是哀子之稱不特爲母亡也孟子幼而無父曰孤故父喪亦稱孤子如嵇康與山巨源絕交書少加孤露又趙彥深見母自陳幼小孤露此皆以無父言

然雜記諸侯之禮他國弔合禮皆對曰孤某須矣曲禮
諸侯在喪曰適子孤左傳列國有凶稱孤在喪也有凶
也皆通乎父母之喪言之非專係乎父也宋書巴陵王
休若傳謝沈居母喪被起聲樂酣飲不異吉人並不知
沈居喪適自稱孤子衆乃駭愕袁粲傳粲丁母憂桂陽
王休範爲逆粲扶曳入殿慷慨謂諸將曰孤子受先帝
顧託本以死報今日當與褚護軍同死社稷是母喪亦
稱孤子矣六朝人每言偏孤如梁書韋叟傳父義正早
卒叟少而偏孤事母以孝聞北史皇甫和十一而孤母
夏侯氏親授以經書此則其父先亡者也梁書裴子野
生而偏孤爲祖母所養魏書裴延儻少偏孤事後母以

孝聞北史刁冲年十三而孤祖母高氏哀之撫養尤篤此則其母先亡者也謝貞傳貞以母憂毀瘠將歿謂姚察曰孤子黷禍所集將隨灰壤時貞父已先亡此則父母俱亡者也可見孤字之義本無定屬董禕又引鄭氏禮注三十以內未有室而無父母者謂之孤子當室如禮所云父母存衣冠不純素孤子當室衣冠不純采是也今世以孤屬父以哀屬母者實本於司馬溫公書儀而朱子亦是之或問朱子孤哀二字之義朱子曰溫公亦只據今俗不欲父母混并之也且從之亦無害是孤哀分屬父母在宋世已然又按開元禮四品以下卜宅兆泣卜者命曰孤子某云云注曰今儀父及祖稱孤子

孤孫母及祖母稱哀子哀孫則孤哀之分稱實始於唐
又不自溫公始蓋自唐以來已相沿成俗而溫公仍之
耳又宋政和禮虞祭至大小祥祭祝文父曰孤子母曰
哀子則亦不獨載之溫公書儀也

下官

戲本凡官員自稱皆曰下官漢書賈誼傳大臣罷軟不
勝任者曰下官不職下官二字始此然非官員之自稱
也其以之自稱高江村天祿識餘謂始於梁武帝改稱
臣爲下官按此說非也南史劉穆之傳宋以前郡縣爲
封國者諸王所封之國其內史相並於國主稱臣去任便止孝建
中乃創制稱爲下官宋書武帝孝建二年定制諸王封

國者二十四條內一條凡封內官止稱下官不得稱臣
罷官則不復追敘通典及龔熙正續釋常談皆引之然
晉書成帝時庾亮欲廢王導與郗鑒書公與下官並荷
托付大姦不掃何以見先帝於地下晉載記靳準對劉
粲曰下官急欲有所言安帝時劉敬宣答諸葛長民書
曰下官常慮福過災生王誕說盧循曰下官與劉鎮軍
情味不淺王鎮惡乘利趨潼關乏食欲還沈林子怒曰
下官授命不顧今日之事當爲將軍辦之則晉時已有
此稱蓋晉時仕宦者皆自稱下官惟王國之僚屬見其
王則稱臣至宋則并令王國之僚屬見王亦稱下官耳

宋史洪湛傳羣臣請建儲太宗曰若立太子則東宮僚屬皆須稱臣形跡之間易生猜嫌然則宋時東宮官見太子已稱臣矣他如宋文帝

使沈慶之領隊防劉湛謂曰卿在省歲久比當相論慶之正色曰下官在省十年自應得轉又慶之與蕭斌議兵事曰衆人雖知古今不如下官耳學也元顥藉梁兵破洛陽自立沛郡王欣欲附之崔光韶曰元顥引寇兵覆中國豈惟大王所宜切齒下官亦未敢仰從曹景宗醉後對梁武帝誤稱下官帝大笑此皆六朝時仕宦稱下官之故事也又按五代史補宋彥筠謂李知損曰衆人何爲號足下爲羅隱對曰下官平素好爲詩其格致大抵如羅隱故耳然則五代時尙相沿有此稱也今仕途中不復稱下官凡知府自稱卑府府以下皆稱卑職按程榮三柳軒雜識淳熙間高曇進對上稱其不爲高

談梁相戲云高墨不爲高談以何對周益公對云卑牧
且爲卑牧謂武臣見知州自稱卑牧也則屬吏之以卑
自稱自宋已然

小生晚生

漢書朱雲傳雲罷官過薛宣宣曰君且留我東閣可以
觀四方奇士雲曰小生乃欲相吏耶師古註小生謂宣
新學後進乃欲以我爲吏乎小生之名始見此然非自
稱作謙辭也其以之自稱者唐李陽冰自稱其篆書謂
斯翁之後直至小生斯翁謂李斯也又元稹上令狐相公曰白居易
易能詩或爲千言或爲五百言律詩以相投寄小生自
審不能有以過之往往戲排舊韻別創新調名爲次韻

此文士自稱小生之始也朱晦翁和劉秀野詩有小生
自愧衰頹早之句則二字并入之詩矣又晚生二字按
晉書戴淵傳淵弟邈請立學校疏曰今後進晚生目不
覩揖讓之儀隋書薛濬寄弟模書曰吾幼丁艱酷晚生
早孤不聞詩禮是晚生二字晉以來已有之但以之自
稱不知起於何時知新錄云嘉靖丙戌刑部趙公乃費
閣老同年每投謁必書年晚生屠應峻曰趙老真神童
或問其故曰費鵝湖二十作狀元年最少今渠稱晚生
非神童而何此近代稱晚生之見於記載者也

老先生

先生本古者父兄師長之通稱然古人有單稱生或單

稱先者史記蘇秦被刺死齊王求其賊誅之燕人曰甚
矣齊之爲蘇生報讐也註生一作先言先生也叔孫通
諸弟子以制禮皆賜爲郎喜曰叔孫生誠聖人也弟子
稱師曰生亦謂先生也漢書貢禹傳禹請老元帝報曰
朕以生有伯夷之廉史魚之直故親近生今未得久聞
生之奇論也師古曰生謂先生也時禹年八十餘元帝
敬之稱生非輕之乃尊之也此單稱生也史記鼂錯傳
學中商刑名於軹張恢先所徐廣曰先卽先生漢書梅
福曰叔孫先非不忠也註先猶言先生也又建元中上
招賢良公卿曰鄧先好奇計註亦曰鄧先猶云鄧先生
也此單稱先者也王新城謂明朝中官稱士大夫曰老

先本此衛宏漢官舊儀博士稱先生博士師也此又後
代師稱先生之始也至老先生之稱見漢書賈誼傳諸
老先生未能言誼盡爲之對然第謂諸儒之老者耳非
覲面尊奉之呼也至宋始有此稱劉元城語錄凡引司
馬溫公則不著姓名必曰老先生劉過上周益公詩云
呂黎前進士司馬老先生蓋用此故事又鐵圍山叢談
鄭尚明昂老先生也後世京朝官稱老先生蓋始此然
宋史王黼諂事梁師成呼爲恩府先生趙范致書丞相
史彌遠亦但稱先生范上彌遠書曰天下之人無不知李全欲反雖先生亦知其必反時彌遠當國權位最重而范稱之曰先生又吳騷隱金楊巨源開熙復謂安南曰非先生不足以及王此非巨源不足以了此事則宋時老先生之名尙非
仕途常稱元人程鉅夫集有送學舟老先生詩疑此稱

起於元初王弇洲觚不觚錄三司見督撫稱老先生見
巡按稱先生大人則前明老先生之稱猶未濫及王新
城香祖筆記謂京官舊例各衙門稱謂有一定如翰林
稱老先生吏部稱選君印君科稱掌科道稱道長是也
自康熙丙子以後則各部司及中行評博無不稱老先
生矣此又近日京官通稱老先生之故事也

官人

奴僕稱主及尊長呼卑幼皆曰某官人亦有所本杜田
杜詩博議官人乃隋唐間語北史梁彥光傳初齊亡後
訴訟官人千變萬端舊唐書高祖紀官人百姓賜爵一
級武宗紀中書奏赴選官人多京債御覽文士傳棘藿

見陸雲作逸民賦嵩以爲丈夫出身不爲孝子則爲忠臣必欲建功立策爲國宰輔遂作官人賦以反之此官人之見於史傳者然唐以前必有官者方稱官人昌黎集王適墓誌銘云一女憐之必嫁官人不以與兒子是也至宋則已爲時俗通稱宋史岳雲傳雲年十二卽從張憲戰多得其力軍中呼爲羸官人夷堅志易官人及第條有報榜者至逆旅曰此店有易官人及第又陸氏負約一條陸氏再醮後獨步廳事有急足來稱鄭官人有書鄭乃其前夫也張次山妻一條次山喪妻後入京參選偶游相國寺與亡妾遇驚問之妾曰現服事媽媽在城西一空宅官人可以明日飯後來相會此又可見

官人之稱在宋時已爲常談也明制郡王府自鎮國將軍而下稱呼止曰官人然官人之稱已遍於士庶固不僅王府支屬矣

官

世俗以行相呼曰幾官此亦最古梁書武陵王紀聞湘東王繹將討侯景謂僚佐曰七官文士豈能匡濟後紀爲繹兵所敗繹將樊猛入其舟紀曰願送我見七官唐摭言李舟與齊映友善映爲將相舟以書與之猶曰十二官足下

爺

爺本呼父之稱說文云吳人呼父爲爺是也今不特呼

父凡奴僕之稱主及僚屬之呼上官皆用之宋書王戎子緇六歲讀論語郁郁乎文哉外祖何尚之戲曰可改耶耶乎文哉以郁乃其父嫌名也南史侯景既僭位王偉勸立七廟并請七世諱景曰前世吾不復記惟阿爺名標是六朝人但以爺呼父也今通用爲尊貴之稱蓋起於唐世按通鑑高力士承恩久中外畏之太子亦呼爲兄諸王諸公呼爲翁駙馬輩直呼爲爺新唐書翁仲若曰直呼爲爺可見從前但以呼父未有以呼貴官者自此以後遂相沿爲尊貴之稱今世俗所稱王爺公爺老爺所自來矣本南詩不聞爺孃喚女聲杜詩見爺仰而啼爺娘妻子走相送此爺字之入詩者

爹

莊綽雞肋編云今人呼父爲爹母爲媽兄爲哥舉世皆然問其義則無說爹字雖見於南史梁始興王憺刺荊州還民歌之曰始興王人之爹赴急如水火何時來哺乳我荆楚方言謂父爲爹乃徒我切又與今世俗所呼之音不同也云云然戴埴鼠璞已辨之謂爹字原有兩音按廣韻陟斜切羌呼父也徒可切北方人呼父也隋書回紇傳以父爲多唐書回紇阿唆可汗亦呼其大相頡干迦斯曰兒愚幼惟仰食於阿多國政不敢與也則亦與徒可切之音相近矣又韓昌黎祭女文亦有阿爹阿八之稱宋人小說記顯仁太后自金回值壽節高宗

極天下之養用宣和故事以龍涎沉腦屑灌燭內列十數枝白太后曰此燭頗愜聖意否太后曰爾爹每夜常設數百枝上私謂憲后曰如何比得爹爹富貴仇遠裨史錢良臣自諱其名其子讀書凡遇良臣字皆令避之一日讀孟子今之所謂良臣古之所謂民賊也亦改云今之所謂爹爹古之所謂民賊也聞者大笑

家祖家父家君家兄舍弟家姑家姊

賓退錄云今南北風俗稱其祖及父母莫不加以家字按後漢書王丹傳大司徒侯霸欲與丹交遣子昱候於道曰家公欲與結交列女傳馬融女嫁袁隗隗譏融有貪名妻曰孔子不免武叔之毀家君獲此故其宜爾顏

之推家訓云昔侯霸之子孫稱其祖曰家公陳思王稱

其父曰家父母曰家母潘尼稱其祖曰家祖則家祖家

父家母之稱由來久矣魏略文帝嘗言家兄孝廉自其

分也家兄謂晉載記苻堅時慕容泓起兵與堅書曰資備

大駕奉送家兄皇帝家兄謂慕容暉也北史楊津傳津事兄椿極

敬人有就津求官者津曰此事須家兄裁之陽俊之自

言有文集十卷家兄謂陽休之亦不知吾才士也梁元帝攻蕭

詧謂其兄譽詧曰家兄為釋所攻無辜屢被攻圍七父若顧親恩豈

應若是此家兄之稱之見於史傳者也又魏文帝謝鍾

繇見與玉珎書曰是以令舍弟子建因荀仲茂從容喻

鄙旨又世說戴安道高隱而其兄欲立功業謝太傅曰

卿兄弟志業何其大殊哉曰下官不堪其憂家弟不改
其樂商史齊東昏賜蕭懿死懿臨歿謂使者曰家弟在
雍深爲朝廷憂之家弟謂梁武帝
時爲雍州刺史唐書柳公權爲侍書學士
其兄公綽與宰相李宗閔書曰家弟本志儒學以待書
見用頗類工祝願徙散秩此舍弟家弟之見於史傳者
也顏之推又云姑姊妹已嫁則以夫氏稱之在室則以
次第稱之言禮成他族不得稱家也子孫不得稱家者
輕略之也然蔡邕書文稱姑姊曰家姑家姊北史高道
穆爲京邑出遇魏帝姊壽陽公主不避道道穆令卒棒
破其車公主泣訴帝帝他日見道穆曰家姊行路相犯
深以爲愧則家姑家姊之稱亦有自來矣今俗惟子孫

不稱家其猶顏氏之遺訓歟褚河南帖稱其姪曰家姪

堂兄弟

俗以同祖之兄弟爲堂兄弟按禮經曰從兄弟無堂兄弟之稱也其稱蓋起於晉時晉書司隸荀愷有從兄喪自表赴哀詔未下而愷造太傅楊駿第傳咸因劾奏愷曰死喪之威兄弟孔懷同堂方隕輒行造謁急諂媚之敬無友于之情同堂之見於史者始此南史劉暄傳徐世欒曰明帝是武帝同堂尙加減害後魏書公孫獻封氏之甥其從兄遂李氏之甥地望懸隔祖季珍曰士大夫須好姻親二公孫同堂兄弟耳吉凶會集便有士庶之別元顯人洛廣陵王遙欣集衆議曰北海長樂俱是

同堂兄弟今欲何向北齊書孝昭帝謂趙郡王叡曰須
拔是我同堂弟舊唐書中宗卽位以堂兄千里爲成紀
郡王又李師道伏誅其堂弟師賢等並流張獻誠請老
薦其堂弟獻恭自代徐堅傳詔書有與逆黨同堂親不
得任京官柳漁傳臣堂伯祖爽與褚遂良等同被譴戮
則更有堂伯祖之稱矣唐書韋瓘傳有議堂姨舅服制
一疏又有堂舅堂姨堂甥之名

尊老尊兄令弟

杭州人自稱其父曰尊老徽州人自稱其兄嫂曰尊兄
尊嫂他處則稱人之父曰尊公尊老稱人之兄嫂曰尊
兄尊嫂按晉書載記劉淵謂傅祗之子暢曰尊公雖不

達天命然各忠其主南史何子平之母年未及終養而籍註有誤年例已滿子平卽便去官顧愷之謂曰尊上年實未八十親故所知何卽辭祿吉玢之父犯重罪玢乞代父死蔡法度誘之曰上知尊侯無罪行當自釋北史楊播與北海王詳議論不屈詳顧播姪昱曰尊伯姓剛不服理唐書李林甫恐嚴挺之大用乃謂其弟損之曰上待尊兄意甚厚盍爲見上策此皆稱人之父母伯叔爲尊而非以自稱其父母伯叔也然以之自稱亦有所本何子平爲揚州從事月俸得白米輒易粟麥人曰所利無幾何足爲煩子平曰尊老在東不辦得米何心獨享白粲是自稱其父曰尊老也三國志註袁術與袁

紹書曰神應有徵當在尊兄北齊書後主緯居南宮其弟琅瑯王儼從上皇胡后居北宮嘗於南宮見新冰早李還怒曰尊兄已有我何竟無後儼殺和士開後主緯使人召儼儼曰尊兄若欲殺臣臣不敢逃罪此自稱其兄曰尊兄也隋煬帝將卽位先縊死其兄勇乃卽位曰令兄之弟果堪大任此又自稱其兄曰令兄也謝靈運與惠連弟詩云末路值令弟酬問問心顏杜工部詩令弟草中來倉然請論事是又自稱其弟曰令弟也

丈人

王充論衡人形一丈正也故名男子爲丈夫尊公嫗爲丈人也至堦呼婦翁曰丈人不知起於何時吳曾能改

齊漫錄謂本於史記匈奴謂漢天子我丈人行也然史記注丈人尊長之稱非必專以之指婦翁也論語子路遇丈人莊子子貢遇灌園丈人戰國策秦王謂唐雎曰丈人芒然而來嚴遂奉百金於聶政曰爲丈人粗糲之資史記荆軻傳高漸離家丈人名使前擊筑灌嬰聞魏勃本教齊王反責之勃曰失火之家豈暇先言丈人而後救火乎宋書袁熙爲彭城王義康說范蔚宗曰小人請以七尺之軀立功事成歸諸吾子丈人何如孔熙先亦以語激蔚宗曰丈人若謂朝廷相待厚者何故不與丈人爲婚南史張充與王儉書曰所可推襟送抱者惟丈人而已唐書元載擅權時有丈人從載求官載度其

人不足任事但贈河北一書丈人不悅及往謁節度使
大獲過望杜甫贈韋濟詩丈人試靜聽是皆尊者通稱
耳三國志獻帝舅車騎將軍董卓承句裴松之註云靈帝
母董太后之姪於獻帝爲丈人古無丈人之稱故曰舅
也此則雖非妻父然以舅爲丈人則裴松之時已有是
稱而妻父曰外舅則以外舅爲丈人蓋亦卽起於是時
耳莊綽雞肋編引柳子厚稱妻父楊詹爲丈人以爲後
世呼妻父爲丈人之始然南史齊東昏呼潘妃父寶慶
爲阿丈唐書杜黃裳之婿韋執誼爲相黃裳勸其請太
子監國執誼曰丈人甫得一官奈何啓口議禁中事是
六朝及唐已有是稱宋史張永德乃郭威壻威起兵常

遇謂永德曰君視丈人事得成否此又近代婦翁稱丈人之故事也蓋唐以前凡尊長及婦翁皆曰丈人後遂專以屬之婦翁耳今人呼婦翁爲丈人而稱交游中尊者亦尙曰某丈想六朝及唐亦如此也至婦翁曰岳丈曰泰山其說尤紛紛不一或曰晉樂廣爲衛玠妻父岳丈蓋樂丈之訛也釋常談則曰因泰山有丈人峯故也按泰山有丈人峯而玉璽經青城山黃帝亦封爲五岳丈人則山之稱丈人者不一世俗以婦翁有丈人之稱而丈人又有山岳之典遂引以爲美稱耳晁氏客語引開元十三年封禪泰山三公以下例遷一階張說爲封禪使其壻鄭鑑自九品至五品會大宴明皇訝之黃幡

緯曰泰山之力也

宋人釋常談引此以爲
謂丈人爲泰山之始

然則唐時并已有泰

山及岳丈之稱矣又黃譜筆記謂漢郊祀志大山川有
嶽山小山川有嶽壻山嶽而有壻則嶽可以呼婦翁矣
世俗之稱未必不因此又因山嶽而轉爲泰山耳此雖
近附會亦可備一解

通鑑唐紀宗延壽集出奔
至壻水部成神僧述幸

舅

舅之稱有三爾雅母之舅弟爲舅秦風所謂我送舅氏
是也妻父曰外舅孟子註謂我舅者吾謂之甥是也夫
之父曰舅禮記所謂舅姑爾雅所謂姑舅在則稱君舅
君姑沒則曰先舅先姑是也後人呼妻兄弟曰舅本非
古法爾雅謂妻之昆弟爲甥劉熙釋名謂之外甥是今

之所謂舅正古之所謂甥乃俗呼正相反蓋妻之昆弟
方謂我之子爲甥而我呼妻之兄弟亦爲甥本無差別
故從乎已之子之稱以尊之耳新唐書朱延壽傳延壽
爲楊行密妻弟行密以其私附朱全忠乃誑其妻曰吾
喪明諸子幼得舅來代我無憂矣及至乃殺之通鑑則
云軍府事當悉授三舅胡三省註云延壽第三呼妻之
兄弟爲舅始見於此則五代時已有此稱也

內兄弟

儀禮姑之子稱外兄弟舅之子稱內兄弟閭若璩云今
人稱妻弟爲內弟非也從史記當稱妻弟從漢書當稱
婦弟云云然顏真卿家廟碑銘云祖昭甫工書與內弟

殷仲容齊名父惟貞少孤育於舅仲容氏蒙教筆法是
仲容乃昭甫之妻弟也而云內弟則妻弟之稱內弟自
唐已然

親家翁

輟耕錄云男女姻家相呼曰親家翁此三字見唐書蕭
瑀傳瑀嘗因宴太宗語羣臣曰自知一座最貴者先把
酒羣臣相顧未言瑀引手取杯帝問何說曰臣是梁朝
兒隋室皇后弟唐朝天子親家翁又唐明皇女新昌公
主下嫁蕭嵩子衡嵩妻入謁帝呼爲親家母是也然隋
書煬帝令宇文述之子士及尙公主呼述爲親家翁述
治李渾獄成帝曰吾宗社幾獲賴親家翁而獲全則隋

時已有此稱。又後漢書禮儀志上陵之儀百官四姓親家婦女咸列。註凡與先后有瓜葛者曰親家。是親家二字本起於漢也。五代史李愚代馮道爲相而惡道。每指其所失謂劉昫曰：「此公親家翁所爲。」蓋昫乃道之親家也。蘇氏閒談錄馮道與趙鳳同在中書。鳳女適道仲子。以飲食不中爲道妻譴罵鳳。令婢訴道。凡數百言道不答及去。但云傳語親家翁。今日好雪。此亦親家翁之見於記載者。呂藍衍言鯖謂親家翁。親字讀作去聲。自五代時已然。然亦不始於五代。盧綸作王駙馬花燭詩云：「人主人臣是親家。」則唐已作去聲矣。

耶君大相公

吳斗南云漢制二千石以上得任其子爲郎故謂人之子弟爲郎又其時稱相國爲相君尙書令中書令爲令君使君曰使君太守曰府君故謂郎亦曰郎君云云是郎君之稱其原皆出漢任子也漢以後則凡身事其父者皆呼其子爲郎君而郎君遂爲貴介及裙屐少年之美稱至唐又爲極尊貴之稱并有加之帝王大臣者後漢書西南夷傳越雋太守張翕卒安帝以其有遺愛乃拜其子湍爲太守夷人歡欣奉迎曰郎君儀貌類我府君魏書甄琛好弈碁通夜不止令奴秉燭或時睡輒加杖奴曰郎君辭父母仕宦京師若爲讀書執燭奴不敢辭罪乃以聞碁日夜不息豈向京之意而賜加杖罰不

亦非理南史齊晉安王子懋爲明帝所害子昭基以二寸絹爲書參問消息故吏僧慧見之曰此郎君書也一慟而卒張冲爲梁武帝所圍臨歿囑其子元嗣固守及力屈將降故吏房長瑜曰前使君忠貫日月郎君但當端坐畫一以荷析薪唐明皇欲立忠王璣爲太子而李林甫勸立壽王上猶豫不決忽忽不樂高力士請其故上曰汝揣我何意力士曰得非以郎君未定耶但推長而立之復誰敢爭史思明嘗爲裴寬裨將後據東都訪得其子諤呼爲郎君後唐莊宗爲晉王時令其子繼岌爲張承業舞承業以帶馬爲贈曰郎君纏頭皆出承業俸祿梁敬翔謂末帝曰臣事先帝三十餘年今雖爲相

賈朱氏老奴耳事陛下如郎君徐溫徙治昇州使養子

知誥爲潤州團練使知誥不樂宋齊邱曰三郎驕縱

溫子知

訓也留揚州輔政

敗在旦夕潤州去廣陵一水耳此天授也又吳

王之弟歷陽公濠以國政盡歸徐氏心不平念周本乃
吳之勲舊遂往投之本將出見其子宏祚固諫本怒曰
我家郎君來何爲不使我見此皆身事其父而呼幼主
之稱也周瑜稱周郎何晏稱粉郎何郎潘岳稱潘郎檀
郎江敦稱江郎謝道韞稱其夫王凝之爲王郎王僧辨
稱鮑泉爲玉郎隋滕王瓚尙周武帝妹順陽公主美姿
容時人稱曰楊三郎此皆少年之美稱六朝以來王公
之子弟皆稱之晉書桓元傳元興中有童謠云長干巷

巷長干今年殺郎君後年斬諸桓已而會稽王之世子
元顥果爲元所害是也至唐而郎之稱益尊張易之兄
弟舉朝稱爲五郎六郎安祿山呼李林甫爲十郎劉駱
谷自京來安祿山必問十郎何言宦官李輔國用事宜
者不敢呼其官皆謂之五郎甚至裴坦之子勛呼其父
爲十一郎何后呼元宗爲三郎韋堅唱得寶歌亦有三
郎當殿坐之語優人黃幡綽對元宗并稱三郎郎當代
宗罷李輔國中書令輔國憤之謝曰老奴事郎君不了
而郎之稱直加於帝王矣至如李義山見棄於令狐楚
而有詩曰郎君官貴施行馬東閣無因得再窺楚乃令狐綯
相國之子也
朱滔遣人說田悅曰日者八郎有急滔與趙王來救今

願入郎治兵與滔共取大梁王武俊亦稱田悅爲入郎

朱全忠取河中王珂而縛出降全忠止之曰太師舅之

恩何敢忘

謂珂之父王重榮也

若郎君如此使僕何以見舅於地下

此又皆貴人子弟之通稱也又唐人稱新進士亦曰郎君
撫言薛逢晚年厄於宦途嘗策羸赴朝值新進士榜下綴行而出前導人謂逢曰迴避新郎君是也又後唐莊宗旣被害弟存霸奔投李彥超軍士欲殺之彥超曰六相公來常奏取進止又明宗子從榮年少驕狠或勸之曰河南相公有老成之風相公宜自策勵勿令聲聞出河南之下河南謂其弟從厚也潞王從珂拒命閔帝使安彥威張虔釗等討之從珂在城上自訴從先帝百

戰得天下今何罪而受誅問者哀之楊思權因大呼曰
大相公吾主也遂率諸兵降從珂此又稱幼主爲相公
之見於書傳者也蓋時俗之美稱雖其始本不甚尊往
往漸加之於極貴及相呼旣久則又爲通稱如宋時猶
稱宰相爲相公今則下賤者亦稱相公矣

哥

哥字廣韻云今呼爲兄韻會亦云今人以配姊字爲兄
弟之稱是哥之爲兄其來久矣然舊唐書王珣傳元宗
泣曰四哥仁孝同氣惟有太平四哥謂睿宗也元宗又元
宗子棣王琰傳惟三哥辨其無罪三哥謂元宗也是以
哥呼其父矣顧寧人以爲君父之尊而呼之曰哥名之

不正莫此爲甚然古人稱哥原有數種漢武故事西王母授武帝五嶽真形圖帝拜受畢王母命侍者四非客哥哥此以之稱帝王者也唐元宗與寧王憲書稱大哥及同王真公主過大哥園池此稱其兄者也晉王存勗呼張承業爲七哥又三司使孔謙兄事伶人景進呼爲八哥此亦稱兄長者也王荊公與其子雱評論天下人物屈指謂雱曰大哥自是一箇大哥即謂雱趙善湘臨歿顧其長子疑曰汝官不過監司太守語次子范曰汝開闢恐無結果三哥甚有福但不可作宰相耳三哥謂弟子葵此父之稱其子者也蓋古人又以哥爲郎君之稱雖宮闈之間亦然晉王存勗命其子繼岌爲張承業起舞指錢積謂

承業曰和哥乏錢宜與一積周太祖子青哥意哥皆爲
漢所誅周世宗長子曰宜哥俱見五代史歐陽公名其
子曰僧哥見稗史陸放翁之伯小名馬哥見老學庵筆
記又韓魏公君臣相遇傳英宗卽位光獻太后心不悅
一日謂韓琦曰昨夢這孩兒坐慶寧宮大哥乘龍上天
去大哥謂英宗子神宗也又顯仁太后白金將歸欽宗
卧其車前曰傳語九哥吾南歸但爲太乙宮使足矣他
無所望於九哥也九哥謂高宗則兄之稱其弟也葉紹
翁四朝聞見錄高宗已命高士儂尙柔福帝姬及顯仁
太后歸謂高宗曰哥被番人笑說錯買了顏巷帝姬呼
高宗爲哥則母之稱其子也又高宗禪位後遊大滌山

有陸凝之獻詩高宗曰布衣入翰林可也歸當語大哥
行之大哥謂孝宗也則亦父之稱其子也又前明泰昌
升遐閣臣劉一燝等請熹宗旣出李選侍猶呼哥兒卻
還者三可見宮庭中呼太子諸王皆曰哥乃親貴之稱
思唐時已如此然則顧寧人之議毋亦狃於吳中習俗
而不知哥字之本有是異稱也

陔餘叢考卷三十八

陽湖 趙翼 雲松

娘子

韻會娘子本少女之稱北齊裴讓之謂祖珽曰老馬十歲尙號騶駒一奸耳順強稱娘子可見娘爲少女自昔已然北史后妃傳序高歡妃有馮娘李娘王娘穆娘南史劉孝綽妹嫁徐悱才尤清拔人謂之劉三娘唐書太平公主起兵應高祖號娘子軍楊貴妃初入宮有寵宮中號曰娘子崔令欽教坊記范漢女大娘子亦是竿木家有姿媚花蘂夫人宮詞諸院各分娘子位昌黎祭女挈文稱四小娘子祭姪孫女李千妻稱李氏二十九娘

子東坡爲子邁求婚啓云伏承令子第二小娘子金史
海陵以第二娘子大氏爲貴妃第三娘子蕭氏爲昭容
是皆以娘爲少女之証也然呼母爲娘亦始於六朝木
蘭詩不聞耶娘喚女聲南史竟陵王子良傳武帝爲縣
令時與子良母裴氏不諧遣人送還都子良年小帝謂
之曰汝何不讀書子良曰娘今何處何用讀書北史常
世康傳世康欲引退與子弟書曰娘春秋已高溫清宜
奉隋太子勇語衛王曰阿娘不與我一好婦亦是可恨
阿娘謂母獨孤后也呼母爲娘則娘又爲尊稱矣杜詩
爺娘妻子走相送亦謂母也宋史韓魏公傳宮中稱郭
后爲大娘劉妃爲小娘龍川雜誌仁宗稱劉氏爲大娘

娘楊氏爲小娘娘則竟是母后之稱矣高宗宮中亦有
兩劉娘子一喜誦經宮中呼爲看經劉娘子一善治饌
宮中呼爲上食劉娘子則亦以爲尊稱而非以爲少女
也蓋俗稱與古義往往有不相合者如小姐之姐說文
本蜀人呼母之稱而今世反以稱少女又北史南陽王
綽傳綽兄弟皆呼父爲兄兄嫡母爲家家乳母爲姊姊
婦爲妹妹此亦稱謂之可異者按呼母爲家家亦不獨
北齊蓋六朝時南北皆如此琅琊王儼旣誅和士開等
後主使人召之儼曰士開謀廢至尊刺家家頭使作阿
尼臣故矯詔誅之家家謂母胡后尊兄若欲殺臣臣不敢逃罪若
放臣願遣姊姊來謂後主乳母陸令萱後主見兵不解啓太后曰有

緣更見家家無緣永別又齊文宣以姪女樂安公主妻
崔達拏嘗問公主達拏於汝云何答云甚相敬惟阿家
憎兒文宣乃殺其母

阿家謂其姑

此北朝之呼母爲家家也南

史范蔚宗臨刑其妻罵之曰君不爲百歲阿家作計蔚
宗母泣責蔚宗仍以手擊其頸蔚宗妻云罪人阿家莫
念此南朝之呼姑爲阿家蓋亦因夫呼母爲阿家故婦
稱姑亦同也漢時又有呼母爲社者淮南子說山篇東
家母死其子哭之不哀西家子見之歸謂其母曰社何
愛速死吾必悲哭社高誘註江淮人謂母爲社也四朝
聞見錄宋高宗欲以憲聖吳氏爲后謂之曰俟姐姐歸
常舉行此姐姐指母韋太后也憲聖曰大姐姐遠處北

方妾豈敢干此大姐姐謂高宗元妃邢氏也則南宋又有稱姑及正后爲姐姐者

小姐

今南方搢紳家女多稱小姐在宋時則閨閣女稱小姐子而小姐乃賤者之稱耳錢惟演玉堂逢辰錄記營王宮火起於茶酒宮人韓小姐謀放火私奔是宮婢稱小姐也東坡亦有成伯席上贈妓人楊小姐詩夷堅志傳九者好狎遊常與散樂林小姐綢繆約竊而逃不得遂與林小姐共縊死又建康女娼楊氏死現形與蔡五爲妻一道士來仗劍逐去謂蔡曰此建康娼女楊小姐也此妓女稱小姐也

姨娘

姨本妻之姊妹之稱見爾雅及釋名又左傳莊十年蔡
哀侯娶于陳息侯亦娶焉息嬀過蔡蔡侯曰吾嬀也止
而見之是也然世俗又稱妾爲姨娘亦有所本南史齊
衡陽王鈞五歲時所生母區貴人病便悲戚左右以餽
餽之不肯食曰須待姨瘥晉安王子懋七歲時其母阮
淑媛病篤有獻蓮花供佛者子懋流涕禮佛曰若使阿
姨因此和勝願諸佛令此花竟夕不萎二王皆呼母爲
姨蓋姨本姬侍之稱二王所生母皆非正嫡宮中久呼
爲姨故其子之呼母亦同耳

三姑六婆

輟耕錄三姑者尼姑道姑卦姑也六婆者牙婆媒婆師婆度婆藥婆穩婆也

嫗婆

俗稱乳母曰阿嫗亦曰嫗婆其不乳哺而但保抱者曰乾嫗婆按漢時稱曰阿母讀如阿房之阿所謂長於阿保之手也後漢書袁閎少時往省其父彭城相在途變姓名人無知者既至府吏不爲通會阿母出見之入白夫人乃召入又陳忠傳帝愛信阿母王聖封爲野王君是漢以前皆稱阿母也至六朝始有嫗婆之稱宋書何承天年老始除著作諸佐郎皆年少名家荀伯子嘲之爲嫗母承天曰卿當知鳳凰將九子何言嫗母耶北史

魏靜帝每云崔季舒是我嫗母謂政事皆與之商榷也
北齊書陸令萱以乾嫗婆封郡君唐書哀帝二年九月
詔封嫗婆楊氏爲昭儀第二嫗婆王氏先已封郡夫人
今崔楊氏例改封李商隱七不稱意內云少阿嫗又春
渚記聞施嫗婆年六十育沈氏二子爲人織履及緝紉
之事以供之

連衿

爾雅兩婿相謂曰亞註云今江東人呼爲僚婿嚴助傳
呼友婿嬾真子錄云江北人呼連袂又呼連衿也連衿
二字見此

布袋

俗以贅增爲布袋按天香樓偶得云三餘帖馮布少時
贅於孫氏其外舅有瑣事輒曰令布代之布袋之訛本
此

家生子

奴僕在主家所生子俗謂之家生子按法苑珠林記庸
嶺有大蛇爲患都尉令長求人家生婢子及有罪家女
祭之家生之名見此然漢書陳勝傳秦令少府章邯免
驪山徒人奴產子師古注曰奴產子猶人云家生奴也
輟耕錄引之以爲家生子之據更爲明切

奴才

罵人曰奴才世謂起於郭令公子儀諸子皆奴才之語

非也晉劉淵罵成都王穎曰穎不用吾言逆自奔潰真奴才也田嵩罵楊難敵曰若賊氏奴才安敢希覬非分王猛曰慕容評真奴才雖億兆之衆不足畏况數十萬乎魏爾朱榮謂元天穆曰葛榮之徒本是奴才乘時作亂唐末董璋反以書誘姚洪不聽城陷璋責之洪曰汝奴才固無恥吾義士肯隨汝所爲乎是晉唐已有此語按奴或作駑顏氏家訓謂貴游子弟當離亂之後朝市遷革失皮而露質當此之時誠駑才也又五代史朱守殷傳守殷少事唐莊宗爲奴後爲都虞候使守德勝王彥章攻之守殷無備南城遂破莊宗罵曰駑才果誤予事

底下人

俗稱奴僕爲底下人南史陳伯之傳褚緇謁范雲雲不見緇怒曰建武以後草澤底下悉成貴人吾何罪而見棄唐洋州刺史趙臣議選舉疏有曰授官多底下之人修業抱後室之嘆

阿

俗呼小兒名輒曰阿某此自古然如漢武云若得阿嬌當以金屋貯之蜀先主謂龐統曰向者之論阿誰爲失魯肅拊呂蒙背曰非復吳下阿蒙阮籍謂王渾曰與卿語不如共阿戎談以及謝惠連之稱阿連唐武后之稱阿武婆帝后自稱阿爺之類亦有不連其名而直以次

第呼之者魏略散騎皆以高才充選獨孟康以外戚得
之人共輕之呼爲阿九梁書武帝謂臨川王宏曰阿六
汝生活大可隋書文帝呼其弟瓚爲阿三五代史王從
珂小名阿三莊宗見其勇曰阿三不惟與我同年其敢
戰亦類我各處方言不同而以阿呼名遍天下無不同
也 本朝國語亦以阿厄漪起而余隨征緬甸軍中翻
譯緬文亦多阿喀拉等音凡發語未有不起于阿者嘗
細思其故小兒初生到地開口第一聲卽係阿音則此
乃天地之元音宜乎遍天下不謀而同然也

僧稱

僧之稱釋家從釋道安始道安謂佛氏釋迦今爲佛子

宜從釋氏吊尸因請學佛者皆姓釋氏此僧家稱釋氏
之始其曰比邱者臞仙原始秘書云稱佛爲牟尼謂德
同仲尼也沙門爲比邱謂德同孔子也女沙門曰比丘
尼謂德同孔子仲尼也葉石林避暑錄云晉宋間佛家
初行其徒猶未有僧稱通曰道人按齊書莊嚴寺有僧
達道人講座東昏至蔣山定林寺一沙門病不能避去
藏草間帝將殺之韓暉光曰老道人可念是也僧之自
稱則曰貧道顏竣傳釋僧舍謂竣曰貧道常見識記是
也僧之稱和尚本於釋典羅云出家自羅佛命舍利佛爲
其和尚大目犍連作阿闍黎故沙門以和尚爲尊貴之
稱亦見香祖筆記

牙郎

輟耕錄云今人謂駟僧曰牙郎其實乃互郎主互市者也按此說本劉貢父詩話駟僧爲牙世不曉所謂道原云本謂之互卽互市耳唐人書互作牙牙互相似故訛也然舊唐書安祿山傳祿山初爲互市牙郎則唐時互與牙已屬兩字

名賊

士之有名者曰名士月令季春之月聘名士呂覽尊師篇爲天下名士顯人史記張耳陳餘魏之名士漢書田蚡傳進名士家居者貴之後漢書种暠傳河南尹田歆常舉六孝廉其五人皆有貴戚書命不敢違歆欲自用

一名士乃以謁應詔又黨錮傳陳蕃竇武欲誅宦官引
用天下名士魏志荀攸傳何進徵海內名士攸等二十
餘人又梁習薦州界名士常林楊俊等吳志孫策論太
史慈曰子義青州名士終不欺我裴松之三國志註引
漢末名士錄甚多是名士之稱起於秦漢也亦曰名流
南史阮孝緒傳其爲名流欽尙如此是也亦曰名輩蔡
摯傳其爲名輩所知如此又范泰傳宋武問謝混如泰
者名輩誰比是也亦曰名家裴松之傳晉孝武太元中
選名家以參顧問是也公卿有名者曰名公裴松之論
鍾會名公之子聲譽夙著又郗原別傳河南張範名公
之子宋書謝景仁傳武帝目景仁爲名公之孫以其爲

謝安從孫故云蔡凝傳凝以名公子選尙信義公主是也亦曰名卿漢書王吉傳蓋執諸名卿可幾是也亦曰名臣魏正始中詔撰名臣奏議梁沈約論謝宏微古之所謂名臣宏微當之是也爲人父而有名者曰名父漢書蕭育傳王鳳以育名父之子除爲功曹齊書武帝稱劉景素名父之子是也爲將而有名者曰名將漢書樂布傳贊終爲漢名將李廣傳李廣程不識皆名將是也爲郡守而有名者曰名守南史齊明帝謝瀹徐孝嗣並爲吳興皆號名守是也醫之精於技者曰名醫南史李希遷傳母病名醫療之不能愈又許智藏傳時號名醫是也番長之有名者曰名王漢書宣帝紀單于遣其名

王奉獻顏師古註名王者謂有大名以別諸小名是也
獨漢書蕭育傳郡名賊梁子政阻山爲害右扶風誅之
又唐書高祖女平陽公主遣奴馬三寶諭降名賊何潘
仁李仲文等各率兵會高祖名賊之稱大奇

姦細

舊唐書王賔傳云此輩降蕃翻作細作宋史紹興二年
翟汝文與秦檜對案相詰目檜爲金人姦細

別號

月令大雩帝鄭康成註云帝上帝也乃天之別號別號
二字始見於此然世之有別號古不經見吳萊三墳辨
謂歸藏本黃帝之別號則別號起於上古韓詩外傳及

漢書古今人表謂帝嚳學於赤松子淮南鴻烈作赤誦
子此又在黃帝之前則別號當以赤松爲首然歸藏乃
黃帝書名赤松亦或周秦人所臆撰未必上古之人如
後世於字名外別立一號以自標榜也別號當自戰國
時始丹鉛錄云戰國策秦惠王時有寒泉子注云秦處
士之號史記索隱云甘茂居渭南陰鄉之樗里故號樗
里子又范蠡去越自號陶朱公又號鴟夷子皮又號海
濱漁父蘇秦張儀皆師鬼谷子南華書有庚桑子秦漢
間有江上丈人河上公之類皆後世所謂別號也然其
人類多隱逸者流欲自諱其姓名而爲此非如後人反
借此以自標異也兩漢之時尙少其見於史傳者惟商

山四皓綺里季角里先生等四人至今終莫知其姓氏
又封君達號青牛師程高醫術自言得一老父號培翁
者至晉而陶潛號五柳先生南齊臧榮緒號被褐先生
梁陶宏景號華陽隱君人間書札卽以隱君代名又瘞
鶴銘有華陽真逸說者謂卽宏景別號或以爲顧況別
號北史李昭徽將妻子入嵩山號黃冠子李綽常逸游
放恣自號隱君李公緒自號達生丈人鄭道昭號中岳
先生則別號之風漸開然尙皆畸人逸士好奇弔詭者
之所爲卽至有唐如李淳風之父號黃冠子王績號東
臯子又號無心子山游巖號由東隣鄒世隆號隱元先
生張薦號史遁先生鄭薰號七松處士賀知章歸老後

號四明狂客又號秘書外監元結號漫郎又曰聾叟又曰琦玕子郗純號伊川田父陸羽號桑苧翁陸龜蒙號江湖散人又曰天隨子又曰甫里先生張志和號烟波釣叟又曰元真子司空圖號耐辱居士亦皆巖棲谷汲隱居不仕或仕而歸田者乃有此號至達官貴人則自以官位相呼不聞別署一號以托高致也達官貴人之有別號蓋始於宋之士大夫亦謂之道號如長樂老六一老泉半山東坡之類相習成風遂至販夫牙僧亦莫不各有一號宋人小說載某官拿獲一盜責其行劫盜輒曰守愚不敢詰之則守愚者其別號也盜賊亦有別號更何論其他矣近有人訊別號詩曰孟子名軻字未

傳如今道號却紛然子規本是能言鳥又要人稱作杜鵑可爲一笑也輟耕錄吾子行云唐人雖有道號却不曾刻入印章別號刻印亦自宋人始

古人雖無別號而學行足以服人人自有加之美號者如東觀漢紀每臘賜博士羊甄宇獨取最瘦者後詔問瘦羊博士所在京師人因以號之後漢書伏生之後世傳經學清淨無競州人號爲伏不鬪董宣爲洛陽令人號爲卧虎鄭均家居年老賜尙書祿人號爲白衣尙書張霸年數歲卽知孝讓人號爲張曾子魯匡有權術人號爲智囊江革至孝人號爲江巨孝黃憲德甚高袁閔稱爲顏子楊震博學諸儒稱之曰

關西孔子廖扶高行人稱爲北郭先生馬瑤隱沂山人號爲馬牧先生以及漢末三君八俊八顧八及八厨之類黨錮傳所謂海內希風之流共相標榜天下名士爲之稱號也南史宗元卿性至孝鄉里號曰宗曾子蔡曇智人稱蔡曾子何伯璵人號爲何展禽滕曇恭至孝王儉稱爲滕曾子周續之通十經人稱爲顏子徐陵早慧慧雲師亦稱爲顏回孔休源多識典故人稱爲孔獨誦許懋明於故事時稱爲儀註學江祐又稱之爲經史笥唐書李守素淹通譜學虞世南稱爲肉譜張鷟工文詞如青錢萬選員半千稱之爲青錢學士殷踐猷博學人稱爲五總龜谷那律淹貫

羣書褚遂良稱之爲九經庫王起博學人號當世仲
尼賈會有高節人稱關中曾子裴敬彝以孝行文學
重於時人號爲甘露頂薛大鼎爲滄州鄭德本爲瀛
州賈敦頤爲冀州皆有治行人稱爲鑑脚刺史北夢
瑣言趙光逢風神秀異人稱爲玉界尺元史廉希憲
好孟子人稱爲廉孟子明史永樂中周新爲御史人
目爲冷而寒鐵魯穆爲福建僉事人呼爲魯鐵面李
綱巡按南畿罷贓吏四百餘人稱爲鐵御史黃紱剛
直人呼爲硬黃馮恩劾汪鉉被逮朝審時與鉉爭詈
時謂其口膝膽骨皆鐵稱爲四鐵御史

混號

世俗輕薄子互相品目輒有混號呂氏春秋簡選篇頁
桀號移大犧謂其多力能推牛倒也此爲混號之始史
記酷吏郅都人號爲蒼鷹嚴延年人號爲屠伯漢書宣
帝求得外祖母王媼乘黃牛車詣闕百姓謂之黃牛媼
後漢書郭況家富號金穴馬援稱公孫述爲井底蛙蜀
志孔融稱袁術爲塚中枯骨顏師古匡謬正俗人呼董
卓爲董礫魚豢典略記禰衡稱荀文若可借面弔喪趙
稚長可監厨請客魏志許褚多力而癡人稱爲虎癡世
說晉張湛好于齋前植松柏袁山松出遊好令人歌輓
時人謂張屋下陳屍袁道上行殯晉書羊曼人號爲輅
伯載記李特之先自巴西至楊車坂抄掠行旅人號爲

楊車巴干寶撰搜神記人謂之鬼董狐南史宋武帝少
未涉學及爲相頗慕風流有所談論人不敢忤惟鄭鮮
之難必切至帝感其輸情終厚之時人謂鮮之爲格倭
沈慶之患頭風嘗着狐皮帽羣蠻惡之號曰蒼頭公殷
景仁號殷鐵范蔚宗以香名嘲朝士謂庾仲文爲麝香
何尙之爲零藿沈演之爲詹糖羊元保爲棗餠徐湛之
爲甲煎慧琳爲蘇合孝武帝狎侮羣臣多鬚者謂羊顏
師伯缺齒號之曰齕劉秀之儉恡謂之曰老慳王元謨
本北人號之曰老僮廢帝以湘東王或肥大盛以竹籠
謂之豬王以建安王休仁爲殺王以山陽王休祐爲賊
王齊東昏時奄人王寶孫有寵號爲侯子梁武時陸駿

容貌特醜人號爲生犀劉胡面均黑人號均胡蕭惠開
在蜀嚴猛人謂之卧虎蕭坦之肥黑語筆嘶人號爲蕭
啞北史古弼頭尖魏道武名之曰筆頭時人呼爲筆公
元暉與盧昶爲魏宣武帝所寵人號曰餓虎將軍飢鷹
侍中李崇在淮南亦號曰餓彪許惇爲主簿以明斷稱
人號爲入鐵主簿惇美鬚人又號爲長鬚公谷楷眇一
目性暴酷人號爲瞎谷武元琮每向臺駕赤牛人號赤
牛中尉元慶智爲主簿事無大小得錢乃判或十數錢
或數十錢時號十錢主簿魏明帝爲太子時郭祚以黃
羈奉之祚又與應詔趙桃弓相附人號爲桃弓僕射黃
羈少師祚子景尚善事權勢人號爲郭尖宇文忠色黑

裴伯茂呼爲黑字邢昕好忤物人謂之牛副李象使于

梁談者謂牛象圖李世哲善事人人號爲李維柳遠無

拘檢人謂之柳癩諸葛穎好譖毀人時號爲冶葛宗道

暉好着大屐冀州人語曰顯公鐘謂宋公鼓宋安德宗道

暉屐李洛姬肚謂之四大梁彥光官相州政弛緩人

呼爲戴帽餉崔暹貪酷人呼爲癩兒刺史侯景呼韓軌

爲噉豬腸兒河南人笑河北人食榆謂之稽榆賊唐書

崔日知爲太常卿自以歷朝久每朝集常與尙書同列

時號尙書裏行竇從一娶韋后乳母爲妻世謂媼背爲

阿奢時人因呼從一爲國奢盧藏用隱終南山有意當

世人目爲隨駕隱士姚崇當國盧懷慎不能有所建白

人稱伴食宰相酷吏周興人呼爲牛頭阿婆李林甫傾險人呼曰李猫來瑱善擊賊賊呼爲來嚼鐵裴寬貧時衣碧瘡而長人呼碧鶴雀張公素眼多白人稱白眼相公常袞爲相政事壅滯人謂之瞢伯資輩與人言若不出口世稱囁嚅翁賈申倚其叔參勢招權納賄人目爲喜鵲王志愔政嚴厲人呼曰皂鵬杜悰爲相未嘗薦士時號秃角犀令狐綯執政其子滿用事人號白衣宰相崔休四拜宰相人號崔四入唐時宦官多閩人杜宣猷爲觀察使歲遣祀奄人募時號敕使募戶于嶺在襄陽騎縱不法初襄陽縣器名天下謂之襄樣至是以嶺故凡方鎮不法者皆謂之襄樣節度鄭棨作詩爲俳諧語

故使落調人稱爲歇後鄭五路嚴與韋保衡當國勢動
天下人目其宅爲牛頭阿旁言如鬼陰惡也李匡威殘
暴人稱金頭王張鷟朝野僉載武后時張元一好品題
以趙廓渺小起家御史謂之梟坐鷹架魯孔邱爲拾遺
有武夫氣謂之鷲入鳳池蘇味道有才識爲九月得霜
鴈王方慶體質鄙陋爲十月被凍蠅婁師德長大而黑
一足蹇爲行轍方相吉頊長大好昂頭行視高而望遠
爲望柳駱駝袁本身黑而瘦爲嶺南考典朱前疑身體
垢膩爲光祿掌饈東方虬身長衫短爲外軍校尉唐波
若矮短爲鬱屈蜀馬長孺子視望陽爲呷醋漢蘇微舉
止輕薄爲失孔老鼠而張元一腹粗脚短吉頊亦目之

爲逆水蝦蟆又侯思正好食籠餅每縮葱和肉其中人
呼爲縮葱侍郎朱隋侯姿少媚爲腫亂土梟賀若瑾眼
皮急項又粗爲飽乳犢子又魏光亦好品題朝士以姚
元之長大行急爲趣蛇鵲鵲盧懷慎好視地爲覷鼠猶
兒姜皎肥而黑爲飽樵母猪倪若水黑而無鬚髭爲醉
部薄精齊處冲好眇目視爲暗燭底覓蝨老母呂延嗣
長大少髮爲日本國使人又曰鄭勉爲醉高麗蔡孚爲
小州醫博士張孝嵩爲小村方相楊仲嗣爲執鍬上獬
獬袁輝爲王門下彈琴博士魏恬爲祈雨婆羅門李全
交爲品官給使李廣爲飽水蝦蟆而張鷟旣號青錢學
士有董方九舉不第號白蠟明經時人以之屬對又通

鑑李全交王旭爲御史專以酷虐爲事人號李爲鬼而
夜叉王爲人頭羅刹中書舍人陽滔適當草敕而令史
持鑰他出無舊本檢尋乃斷窻取之時稱斷窻舍人朱
泚之亂源休姚令言收圖籍貯倉廩自比蕭曹人目爲
火迫鄧侯北夢瑣言韋宙有積穀七十堆宣宗稱爲足
穀翁夏侯籍爲人鄙穢人目爲夏侯驢子蘇楷無行人
稱爲衣冠土偶夏侯孜少淪落人稱爲不利市秀才溫
庭筠貌陋人稱爲溫鍾馗方干謁王龜大夫一見卽兩
拜王答之未起問干又一拜時稱爲方三拜蔣侍郎凝
貌甚美時稱爲水月觀音五代史李振爲朱溫腹心每
入京必有貶降人目爲鴟梟劉仁恭爲小校時善穴地

攻城軍中號劉窟頭後唐莊宗優名李天下又優人郭從謙混名郭門高李罕之攻摩雲山居民盡殺之人號爲李摩雲明宗淑妃王氏有美色號花兒羞崔協不識文字人號爲沒字碑廢帝時張敬達性剛人謂之張生鐵石晉時安重榮號安鐵胡高季興到處稱臣又好劫鄰道貢物人呼爲高賴子梁有驍將陳章號陳野又慕容彥超黑色胡髯嘗月姓閬人謂之閬崑崙馬幸孫爲相號爲三不問謂不開口以議論不問即以行事不開門以延士大夫也南漢劉鋹有肥妾號媚猪宋史韓通性剛嚴人謂之韓瞪眼其子病瘦人謂之橐駝兒李重進色黯人呼爲駝黑大王韓溥熟唐朝故事人稱爲近

世肉譜吳時敏于文人稱爲立地書厨王繼勲善用鐵鞭鐵槊鐵搥人稱爲王三鐵王彥昇好擊劍人稱王劍兒李沆爲相無所建白人稱爲無口瓠張士遜爲相無所可否人稱爲和鼓王珪爲相人稱三首相公上殿云取聖旨下殿云領聖旨出語人云已得聖旨也魯宗道性骨鯁人目爲魚頭叅政劉安世強直人目爲殿上虎趙忬稱鐵面御史錢顗亦稱鐵肝御史王廷義好自大每言我當代王景之子人稱爲王當代王承祐爲團練使好言事人稱爲武諫官陳思讓酷信釋氏人目爲陳佛子祁廷訓形質魁岸而無才人呼爲橐駝姚內貲善戰夏人目爲姚大蟲燕瑛在嶺南括犀珠香藥以賂權

要人目爲香燕陳象輿董儼日夕會趙昌言第京師語
曰陳三更董半夜蘇紳與梁適同在兩禁皆險詖人語
曰草頭木脚陷人倒卓劉隨事明銳人稱水晶燈籠
孫道夫亦有此稱葉祖洽逢迎宰相曾布人目爲小訓
狐楊畏進於元豐顯於元祐遷于紹聖人目爲楊三變
李邦彥爲相人目爲浪子宰相薛昂無學術爲大司成
請罷史學哲宗斥爲俗佞王德擒夏將姚太師姚對欽
宗曰被縛時但見一夜叉耳人呼爲王夜叉王俊善告
訐號王鵬兒何羣性剛同舍生目爲白衣御史李先治
信州有聲人目爲錯安頭言其貌陋而有才也在楚人
又目爲照天燭以其明也章鑑與人多許可人口爲滿

朝歡張成戰酣則兩眼皆赤時號張紅眼又號張鶻眼
李全將張惠多力人目爲賽張飛獨醒志姜遵知閑封
府人號姜擦子言其威也祥符中有王捷者善燒金人
謂之王燒金詩話總龜劉吉南治河人呼爲劉跋河同
時內侍石金振領河隄使尤苛急人呼爲石爆裂貢父
詩話薛簡肅尹京以嚴爲治人號爲薛出油陳彭年竭
精盡思以固寵人謂之九尾狐宋中道穎利而么小蘇
子美呼爲錐宋盛度體豐大丁謂疎瘦梅詢好薰香寶
竇不事修潔時人謂盛肥丁瘦梅香寶吳皇祐中士多
馳騫請托有一人號望火馬一人號日遊神崔遠風致
峻整人目之爲釘座黎慶歷中有衛士震驚宮闕捕得

殺之御史宋禧言蜀有羅江狗宜畜之以警夜時謂之
宋羅江御史席平鞠獄畢上殿仁宗問其事奏曰從車
邊斤矣斬也時號車斤御史翰苑名談有吉水令治邑嚴
酷馬道爲啄木詩諷之人目爲馬啄木宋史王安石去
位請以韓絳代而呂惠卿佐之二人守其成規不變時
號絳爲傳法沙門惠卿爲護法善神又王景亮結一社
專以嘲笑爲事人號其里曰豬嘴關以呂惠卿清瘦語
次輒以手指畫謂之說法馬留邵簾高鼻鬚以上殿
泄氣出知東平謂之泄氣獅子陳和叔少通率暮年爲
質朴之狀時謂之熱熟顏回孔文仲對策有爲痛哭嘆
息之語和叔語人曰此可謂杜園賈誼也王平甫笑曰

杜園賈誼正可對熱熟顏回耳拊掌錄米芾好怪常戴
俗巾衣僧衣人曰爲活卦影薛昂賦蔡京君臣慶會詩
逢時可謂真千載拜賜應須更萬同時人謂之薛萬回
蔡元度對客嬉笑人莫能測時稱笑而夜叉洛中有稗
將張師權好以甘言悅人時號蜜翁翁楊景宗爲章府
太后弟好以木槌擊人時謂楊骨槌靖康時京城破王
時雍搜取婦女與金人時號爲金人外公又號賣國牙
郎建炎進退志李綱奏曰方金人欲廢趙氏立張邦昌
有吳玠莫俦傳道意旨京師謂之捷疾鬼紹興乙卯以
旱禱雨諫官趙鼎言請禁宰鵝鴨時稱鵝鴨諫議適聞
金有龍虎大王來南侵胡致堂曰此間有鵝鴨諫議足

以當之有鄭廣者本海寇號滾海蛟後歸降授官所謂
鄭廣有詩上衆官文武看來總一般衆官做官却做賊
鄭廣做賊却做官者也周益公日記楊存中人號爲犇
闖以其多犇而善逢迎也亦見王梅溪集嘉定中御史
羅湘上言越州多虎乞飭多方捕殺張次賢奏八盤嶺
乃禁中來龍乞禁人行時有羅擒虎張尋龍之對宋孝
宗夜與胡銓飲有宮人號滿頭花令出侍酒見銓所記
王音問答楊誠齋與尤延之相戲尤呼楊曰羊楊呼尤
曰蝨蟀書問往來尤則曰羔兒無恙楊則曰彭越安在
王梅運勾骨立有風味人號爲風流骸骨金陵府官妓
有極瘦者府尹朱世英謂之生色髑髏開禧中有郭倪

爲殿帥自以爲卧龍酒後輒咏三顧頻煩之句後出師
竟敗對客出涕時號爲帶汁諸葛道士吳含靈好睡人
呼爲吳孫軒渠錄莊綽極臞江仲本呼爲細腰宮院子
夷堅志宗室公衡善滑稽而寡髮人呼爲趙葫蘆湖州
民許六以賣餅爲業人呼曰許糖餅潘姓者善理冥間
事人呼爲潘見鬼陳州人蔡乙極凶惡貌又獠劣人呼
曰取命鬼福州有丐者陳鰓頭婺州一叟自稱養皮袋
鄧人連生好酒每飲必插花于首人呼爲連花鄱陽張
廿二面醜口潤人呼爲張鰓魚宋史韓侂冑當國值生
日陳及之後至門已閉而闌未闌遂僂而入當時有由
寶尙書屈膝執政之謂楊安國少無賴以粥鞍爲業人

呼爲楊鞍兒李全善用槍人呼爲李鐵槍梁成大爲史
彌遠主搏擊人目之爲梁成犬又丁大全陳大方胡大
昌同除諫官人目之爲三不吠犬賈似道當國漕帥朱
浚每有扎稟事必稱浚萬拜時謂之朱萬拜癸辛雜識
杭醫張防禦言語好異人目爲張風子趙孟頫造黑漆
大船極工巧人號爲黑漆船至龔開所讚宋江等三十
六人各有混號如尺八腿一直撞之類尤爲新異也金
史景祖善啖人呼爲活羅_{大鳥}章宗時宮中有優人號玳
瑁頭徒單恭爲總管嘗畫一佛像云當以金鑄之賦屬
縣金而實不鑄金盡入其家時號金總管完顏訛可傳
同時有兩訛可一日草火訛可得賊好以草火燎之一

曰板子訛可嘗誤以牙牌爲板子也故時人以此別焉
亮顏定奴號三脆羹紇石烈牙忽帶號盧鼓椎以其好
用鼓椎擊人也酷吏傳徒單思忠好以麻椎擊人人號
麻椎相公李特立爲人短小鋒利人號爲半截劍馮璧
號馮削雷淵爲御史至蔡州杖殺民之姦豪者凡五百
人時號爲雷半千明史給事中胡以寧請禁食蝦蟆時
號蝦蟆給事成化中帝久不與羣臣相見大學士彭時
商輅力請司禮約以御殿日召對及見纔奏二事萬安
居首卽頓首呼萬歲欲出時等不得已皆叩頭退中官
以此戲朝士一時傳笑以安爲萬歲閣老又是時劉吉
萬安劉珏爲相無所匡正時有紙糊三閣老泥塑六尙

書之謠吉在內閣十八年人目之爲劉棉花以其耐彈也宏治中元守直爲通政使王儆爲左通政姜清李浩爲參議時人謂元哭王唱姜辣李苦蓋元與王聲音俱不稱而姜急躁李氣促也又前明呼蜀人爲川老鼠以其善鑽也呼楚人爲乾魚以其善治鯪魚也呼江西人爲臘雞以元時江西人仕於朝者多以臘雞饋客也嚴嵩生日江西紳士畢集嵩長身聳立諸公俯趨高新鄭在旁笑嵩問故新鄭曰偶思及韓昌黎鬪雞詩大雞昂然來小雞悚而待是以笑耳又嚴嵩當國以萬策爲文選郎方祥爲職方郎人稱二人爲文武管家莆田陳槐齋爲翰林時客至呼茶夫人曰未煮公曰也罷又呼乾

茶夫人曰未買公白也罷時因號陳也罷萬歷中蘇人有邱姓者勤於弔喪而形體短小人呼之爲邱的篤天啓中周應秋附魏奄每魏良卿至其第進豚蹄留飲時號煨蹄總憲又其時有東林點將錄以水滸傳中各混號加之士流李三才爲托塔李天王葉向高爲及時雨之類尤不可枚舉宏光時金陵名妓李香君號香扇墜至如歷代流賊如後漢書黃巾賊其大聲者稱雷公騎白馬者稱張白騎輕便者言飛燕多髭者號於氏根大眼者曰大目如此稱號各有所因以及歷山飛蠅子塊之類更難悉數矣沈括筆談吳人謂梅子爲曹公以嘗望梅止渴也謂鵝爲右軍以換鵝書也有士人遺醋梅

與燂鵝作書云醋浸曹公一甕湯燂右軍兩隻是物類
亦有此雅號矣

諱龜

莊綽雞肋編浙人以鴨爲諱謂鴨僅一雄者不能生卵
須二三雄始有子故俗以此爲諱也今俗以縱妻淫行
者爲龜不知起于何時左傳宋有公子圍龜楚有鬬韋
龜漢有京兆尹陳龜幽州刺史朱龜曹魏有典農劉龜
北魏孝明帝以神龜紀年孝昌中有大臣叱列伏龜正
始中有羽林監王元龜唐時宗室有楚王靈龜嗣曹王
龜年大臣有崔從龜王龜劉崇龜李權龜庶僚有樂朋
龜薛元龜協律有李龜年進士有張仁龜處士有陸龜

蒙道士有解元龜白樂天名其姪曰龜兒字文籍字夏
龜張志和本名龜齡王甫字興龜賀知章稱殷踐猷爲
五總龜謂龜千年五聚問無不知也五代前蜀有京兆
李龜祜宋則呂蒙正之父名龜圖其弟名龜祥卽夷簡
之祖也何承矩之子名龜齡范雍之祖名從龜王大寶
字元龜丁陟傳有員外郎董龜正畢士安傳有郎中王
龜從陳堯封之子漸自號金龜子陳季常作龜軒東坡
贈詩所謂人言君畏事欲作龜頭縮也江陰葛延之訪
東坡于僦耳以親製龜冠獻坡坡答以詩楊時號龜山
紹興中有侍御史黃龜年慶元中有直講彭龜年洪龜
父王十朋字龜齡陸放翁築堂曰龜堂又以龜殼作冠

高二寸許有詩云龜屋新裁二寸冠孟珙傳有隨守張
龜壽金宣宗詔趙秉文楊雲翼作龜鑑萬年錄元至正
中謝應芳自號龜巢老人所著有龜巢集又戴良自著
其居曰龜毛廬是唐宋以來並未以龜爲諱也惟魏太
武斥宋文帝爲龜鼈小豎夫何能爲則亦僅喻其渺小
耳皮口休謁歸仁紹不得見因作咏龜詩北夢瑣言謂
夾蛇龜訊之硬
骨殘形知幾秋尸骸終是不風流頭皮死後鑽須遍只
爲平生不出頭亦謂其不見客耳雞肋編又謂楚人諱
烏龜頭云郡城象龜形嘗被攻有術者教以繫其首而
破故諱之然所諱又是一義皆非謂縱姦也王阮亭漚
北偶談謂諱龜自明始惟張江陵生時母夢一大龜因

名之後仍改名云按明人閩莊駒陰允記謂三山士人鄭唐好訛謔嘗爲一老人題真容曰精神炯炯老貌堂堂烏巾白髮龜鶴呈祥有人橫讀之乃精老烏龜四字也老人遂毀之此可爲明人諱龜之証然所以諱之之故終莫得其說也及閩輟耕錄記秀州多故家大姓其子孫不肖廢敗蕩盡有金方所作詩嘲之曰興廢從來古有之爾家忒煞欠扶持諸墳掘見黃泉骨兩觀番成白地皮宅眷多爲撐目兎舍人總作縮頭龜強奴猾幹欺凌主說與人家子弟知撐目兎謂兎望月而孕以見其不夫而姪也縮頭龜則以喻其夫也想其時已有此諺語而入之詩也又堅瓠集張伯雨贈葉景修詩家藏

逸少籠鵝帖門繫龜蒙放鴨船龜蒙句訕其婦女不潔故藏一龜字云則諱龜起於元時無疑矣

雜種畜生王八

俗罵人曰雜種曰畜生曰王八後漢書西羌傳滇零等招集諸雜種晉書燕載記曰蠢茲雜種奕世彌昌此雜種之名所由始也漢五行志諸畜生非其類子孫必有非其姓者東漢時則又曰畜產後漢書劉寬傳坐客罵蒼頭曰畜生寬私遣人視之恐其自殺曰此人也而被罵畜產吾懼其死也北史高車傳其先匈奴單于生二女單于曰吾有此女安可配人當以與天乃築高臺處之三年有老狼守臺不去小女意其神欲嫁之其姊驚

曰此是畜生無乃辱父母妹不從遂爲狼妻子孫繁茂
成高車國此畜生之名所始也隋文帝寢疾太子廣與
陳夫人侍夫人爲廣所逼奔歸于上上怪其神色有異
問之以實對上恚曰畜生何堪付大事獨孤誤我此又
罵人爲畜生之明文也北齊熊安生以訟事欲訴徐之
才和士開二人及相對時以之才諱雄士開諱安乃不
敢自稱姓名但云觸觸生羣公哂之以其音同畜生也
五代史王建少時無賴以屠牛盜鹽販私鹽爲事里人
謂之賊王八此又王八之稱之所始也金史亦有王八
與王毅共守東明兵敗被執王八前跪將降毅以足踏
之此則不可與王建並稱爲賊明人小說又謂之忘八

謂忘禮義廉恥孝弟忠信八字也

綠頭巾

明制樂人例用碧綠巾裹頭故吳人以妻之有淫行者謂其夫爲綠頭巾事見七修類稿又知新錄云明制伶人服綠色衣良家帶用絹布妓女無帶伶人婦不帶冠子不穿褙子然則伶人不惟裹綠巾兼着綠衣按唐史及封氏聞見記李封爲延陵令吏人有罪不加杖但令裹碧綠巾以恥之隨所犯重輕以定日數吳人遂以此服爲恥明之令樂人裹綠巾或本諸此也

養瘦馬

揚州人養處女賣人作妾俗謂之養瘦馬其義不詳白

香山詩云莫養瘦馬駒莫教小妓女後事在目前不信
君看取馬肥快行走妓長能歌舞三年五年間已開換
一主宋漫堂引之以爲養瘦馬之說本此

冤家

蔣津葦航記談引烟花記云冤家之說有六情深意濃
有死無異心一也兩情相繫阻隔萬端二也臨岐分袂
黯然銷魂三也山遙水遠相思不見四也憐新棄舊怨
深刻骨五也一生一死觸景悲傷六也